

Pɔɔl Gbanƙa Ate Wa Nmarisi A Te TITUS La

¹ Mi Pɔɔl, waai ale ka Naawen tomteero ale Yeezu Kirisita tuintomdo la, ale a nmarisi gbanƙa de.

Naawen ale lueri mu ale ge tom mu me ayen m denɗi baai ate wa lueri ba ayen ba va wa nalimnyiini la kpa, abe m sak ba ate ba seba wensie n̄aai le n̄a basi ate ba va Naawen la.

² Wensie sinsan̄a de nyin̄ ba ta yiila kama ayen wa le jam pa nyuvuri dii ale kan ta kpeglimka la a te ba. Naawen waai ale kan a velim la a lin̄ jam puulim kama dila po dila po ayen wa le pa wa nyuvuri paalika a te ba. ³ Di danni ale jam paari la, wa va ka wa wamaɗsana nyin̄ ate di nyini peelim ate nuruba min̄ di, ate wa yaa weeni nuruba ayen, ba pa wa wamaɗsana a sak. Mi Pɔɔl abe maa ka nuru bala po wanyi a yaa va Naawen ti Varibasidowa noai a pa wie n̄aai ate wa pa nyo mi nisima po la a mooli a sak nuruba.

⁴ Mi ale a nmarisi gbanƙa de a te fi m biika Titus waai ale ta siaka nalimnyiini ale Naawen ase mi ale ta dii la.

Kowa Naawen ale Yeezu Kirisita ti Varibasidowa le niak fu, abe wa basi ate fi boro ale suyogini.

⁵ Mi ale jam basi fu Kariti tenka po la, fi jam wari dula kama ayen fi nye dii ale magsi fi nye la abe fi lueri kpaɗa Kirisita bisaɗa ale a tu chaab

la tenɗaɗa meena a te ba. A teeri m le jam weeni dii a sak fu. ⁶ Ku a fe kama ayen nuru waai ate ni a lueri ayen wa chim kpagi la a kan ta kaasunɗa nuruba jigiya, abe wa ta nipok yen nyiini, abe wa bisaɗa me a ta siaka ale Naawen ale nyɛ kaai le ka basi ate nuruba a kan nya siuk a weeni ayen ba ka nanbolta a yaase tukpari nyam la. ⁷ Ku a fe ayen Kirisita bisa kpagi a kan ta kaasunɗa nuruba jigiya dii nyin la, wa a nya ka Naawen tuima zuk. Ku a fe kama me ayen wa kan chim kanjanta nyɔɔ a yase wa sui a kpabi a puuri ale nuruba, abe wa kan chim danyuiriga, abe wa kan a nyɛ kpaliɗsa a nak nuruba, abe wa kan kasim a yaali ayen wa chim ligra nyɔɔ. ⁸ Alege, ku a fe me ayen wa siak ate nuruba a jam wa yenni abe wa a yaali tuimmanɗa tomka nalimnyiini. Ku a fe kama me ayen wa chim yam nyɔɔ, abe wa chim nuru manɗa nalimnyiini wie meena po, abe wa chim welensa nyɔɔ, abe wa seba wa dek yikka. ⁹ Ku a fe kama ayen wa nmasi yik Naawen wensie wamanɗaɗa ɗaai ate wa sagroma a lin sak wa la. Wa dan yik ɗa nalimnyiini, wa le baga a pa wensie sinsaɗa de a denɗi nuruba ba gela kpa, abe baai me ale a zeri ɗa la wa dak ba kaasunɗa a sak ba.

¹⁰ Nuruma yegayega a kan siak a te Kirisita bisa kpaga noa. Ba pa ka ba wakayaatana a paasi ba suaata. Nuru baai dek ale a sak ayen ku a fe kama ate Kirisita bisaɗa a va Juuma sinsaɗa la, ¹¹ basi ate ba goori ba wannii dii nyin la, ba a sak ka sinsak ɗaai ate ku a fe ayen ba kan sak la. Sinsaɗa de abe a nyɛ kama ate daanika a jam nuruba dokdem meena

jigi. Ba a sak kama me ayen ba nya ligra ba sinsaṅṅa nyin alege ba kan chali chivie ale siuku de choawa ate ba va a nya ba ligraṅa la. ¹²⁻¹³ Ba dek sampoporisana po wanyi dila po dila po ale jam bo Kariti tenka po la, a weeni ayen, “Kariti demma a kasim ka velinvendisa, gaasa nyam, goaduṅsa, puusa nyam ale nyinwotta nyam.” Wa wienṅa de abe ka wensie. Ku a fe kama ayen fi tɔariṅ ba ale nin muna ate ba yik Naawen wensienṅa nalimnyiini. ¹⁴ Ku a fe ate ba kan a wom Juuma sunsuelimaṅa, yaase sinsak ṅaai ate nuru baai ale a zeri wensienṅa la a sak la. ¹⁵ Naawen ale sugri baai suniimaṅa la, ka kisita wie. Alege baai ale kan ta siaka ale wa ate wa an sugri ba suniimaṅa la, bala jigi, kisita boro kama dii nyin la, ba popolaṅa ale ba suniimaṅa a daṅ kama. ¹⁶ Nuru bala chaab a weeni kama ayen ba seba Naawen, alege ba tuimaṅa a kan sak ayen ba seba wa. Ba a zeri wa noai kama. Ba ale a tom dii me la, Naawen kan yaali. Ba an бага a tom tuimmaṅsa.

2

¹ Alege fi Titus ku a fe kama ayen fi pa Naawen wensie sinsaṅṅa a sak nuruba. ² A sak nisomma ayen ba a nye nna chim chim. Ku a fe kama ayen ba chim yam nyam, abe ba seba ba dek yikka. A sak ba ate ba ta siaka nalimnyiini ale Yeezu, abe ba ta yaalika ale nuruba, abe ba a siak a te ba ninammu. ³ Siuk kula po, sak nipok kpagsaṅa ayen ku a fe ate ba chim nipok welensa ba tuima meena po. Ku a fe ayen ba kan a biisi wie ṅaai ale a kaasi nuru yoi la, ba kan pa ba dek a te

daam nyuka. Ba a sak sinsak maŋsa, ⁴ abe ba a sak nipok kalaasaŋa ate ba ta yaalika ale ba choroma ale ba bisaŋa. ⁵ A sak ba me ate ba seba ba dek yikka ale welensa, abe ba chim nipok baai ale seba dok po tuima nalimnyiini ale ge a wom ba choroba noa la, ate ku kan basi ate waai nya siuk a pa yokaasuŋ a te Naawen wamaŋsaŋa.

⁶ Siuk kula po me, ku a fe ayen fi a sak bipaaluku ate ba seba ba dek yikka. ⁷ Wie meena po, ku a fe kama ayen fi dek a tom tuimmaŋsa ate nuruba a yaa tomsi fu. A sak ba ale nin muna ale wensie sinsaŋa. ⁸ Sak ba sinsak ŋaai le ŋa basi ate nuru kan baga a nya siuk a biisi a gaam fu la. Fi dan a biisi wienja de, ale wensie, chivie le yik ti dachaasaŋa kama ate ba kan nya siuk a biisi tama wari ya.

⁹ Ku a fe kama ayen fi sak tomteeroma ate ba a zuli ba nyamma noa wie meena po ate ku te ba nyamma supeentik ale jaab buuri meena ate ba a nye la. Ku a fe kama me ayen ba kan a tulisi ba nyamma noa po filim filim, ¹⁰ Yaase ba a zu ba ŋanta. Ku a fe kama ayen ba lagi ba suniima meena ale ba popola meena wie meena po daa meena a tom a te ba nyamma, ate Naawen ti Varibasidowa sinsaŋa a nya yomaŋ.

¹¹ Dii nyin la, Naawen a nye ka wari a te ti wa niaka nyin ayen nurubiik meena a nya varibasika. Yogyogla de, wa be nyini ka peelim a pa wanni de a sak ti. ¹² Wa dii ate wa nye te ti wa niaka nyin la, wa dila a yaa be ale a sak ti ayen ku a fe kama ayen ti kan pa ti suniima ale ti popola meena a basi tenzuk de ŋanyaalik jigiya. Kan a

nyε wie n̄aai ale kan a va siuku la. Di maari a sak ti kama ayen ti seba ti dek yikka, abe ti chim nuru welensa ale wensie nyam, abe ti a tom tuim n̄aai le n̄a peenti Naawen sui tɛnzuk de meena la. ¹³ Ku a fe kama ayen ti a nyε dila abe ti ta yiila ale supeentik a limsi da dii ate Yeezu Kirisita le n̄man pilim jam tɛnzuk de ale wa zulaŋa ale wa pagrimu yegayegaka la. Wa ka ti Naawen kpeeni ale ti Varibasido. ¹⁴ Wa jam kpi kama ayen wa vari ti ti tuimbaataŋa po a basi abe wa sugri ti suniimaŋa, abe wa soa ti ate ti chim wa dek nuruba, abe ti nina muni ale tuimmaŋsa tomka.

¹⁵ A sak nuruba wien̄a de. Pa Naawen pagrim buui ate wa te fu la a deŋsi baai ale a wom fi sinsaŋa la kpa, abe fi pii nyin̄ a kaam baai ale a tom tuima a kaasi la ate ba tagri. Pa Naawen pagrimu nyin̄ a weeni ba ate nuru waai kan baga a nya fu nueri.

3

¹ Teeri fi nuruma ayen ba pa ba suniima a te ba tɛŋka nalimaŋa, ale ba tɛŋka kpaŋa abe ba a va ba noa, abe ba gomsɪ ba dek a tom tuimmaŋsa.

² Weeni ba ayen ku a fe kama ate ba kan a kaasi nuruba yue, ba kan a nyε kpaliŋsa, ba ta noamasim ale nuru meena, abe ba seba ba dek yikka me.

³ Diipo ate ti jam ze Naawen la, ti jam ka betta. Ti an jam a va wa noaya. Ti jam a paasi ka ti dek. Daa meena ti kasim jam pa ka ti dek a te n̄an yaalik ayen ti sue peenti. Ti kasim jam a tom ka tuimbaata ti suaata jigi ale maari a de nyuri ale ba. Nuruba yegayega a jam kisi ti kama.

Tama me abe jam kisi ba kama. ⁴ Alege Naawen ti Varibasidɔwa a pa wa jirimu ale wa yaalika a sak ti kama ⁵ a yaa vari ti ti tuimbaataŋa po a basi. Wa an jam nyɛ dila ka tama dek tuimmaŋsa nyiŋŋa, alege ka wa jirimu nyiŋ ate wa nyɛ dila. Ka Naawen Chiika ale sugri ti suniimaŋa a yaa te ti biam paalik ale nyuvuri paalik. ⁶ Naawen va ka Yeezu Kirisita ti Varibasidɔwa nyiŋ a sueri ti suniimaŋa ale Naawen Chiika nna yegayega. ⁷ Naawen niaka nyiŋ ate Naawen Chiika a nyɛ ate ti chim welensa nyam Naawen jigi, a yaa basi ate ti ta yiila ayen ti le nya nyuvuri dii ale kan ta kpeglimka la. ⁸ Nyaku de ate m weeni la abe ka wensie ate nuruba weeni.

Mi a yaali kama ayen daa meena fi a sak nuruma wienɔ de nalimnyiini ate bala baai ale ta siaka ale Naawen la, nina muni ate ba a tom tuimmaŋsa ŋaai ale nala a te nuruba la. ⁹ Alege kan a nak betta nampaga, abe fi kan a wom baai ale a sak ba kokpiɛnsa yue wie la. Kan a nyɛ kpaliŋsa ale nuruba Juuma Sinsaŋŋa nyiŋŋa, dii nyiŋ la, nyaŋa de meena kan niak nuru ale maga dek me la, ŋa ka wakayaata. ¹⁰ Nuru dan a yaali ayen wa poori baai ale a va Yeezu la, kaam nuru wala choa ase buye la. Wa dan kan wom fi kaamka, fi ale wala choa kan ta wari a nyɛ ale chaaba. ¹¹ Fi dek seba ayen nuru wala choa ka popola baata nyɔɔɔ. Wa tuimbaataŋa abe a sak waai meena wa ale ka nuru waai choa la kama.

¹² M le tom Atemas yaase Tikikus fi jigi. Ba wanyi a dan jam fi jigi fi me pii nyiŋ ate fi jam m jigi Nikopolis tɛŋka po. Mi a yaali ayen m goa ka dula ate ŋoota wein ga taam. ¹³ Fi dek pii nyiŋ a

maari Zenas waai ale a biisi kooti biisaŋa la, abe fi maa maari Apolos ate ba noai bayewa a baga gomsɪ ba chelimu. Pa jaab buuri meena ate ba a yaali la a te ba. ¹⁴ Sak ti nuruma ayen ba basi ate ba nina muni ale tuimmaŋsa tomka, ate ba baga a maari baai ale sum a yaali maarika la. Ba kan chim nuru kayaata.

¹⁵ Baai meena ale bo ale mi la, a puusi fu. Puusi baai ale a va Yeezu ale ta yaalika ale tama me la, a te ti.

Naawen niaka le bo ale ni meena.

**The New Testament in the Buli language
(Ghana)**

**Buli: The New Testament in the Buli language
(Ghana) (New Testament)**

copyright © 2003 Wycliffe Bible Translators, Inc.

Language: Buli (Ghana)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 3 Mar 2023 from source files
dated 29 Jan 2022

24aad1ee-9f16-5a40-b094-5b16e513253a